

四庫全書

集部

欽定四庫全書

集部
精華錄卷二

詳校官侍讀學士_臣陸伯燧

助教_臣常循覆勘

總校官進士_臣朱 鈐

校對官編修_臣秦 瀛

謄錄監生_臣鄭自彬

欽定四庫全書

集部七

精華錄

別集類六

國朝

提要

臣等謹案精華錄十卷

國朝王士禎撰士禎有長白山錄已著錄其詩
初刻有落牋堂集皆少作也又有阮亭詩及
過江入吳白門前後諸集後刪併為漁洋前
集而諸集皆佚嗣有漁洋續集蠶尾集續集

後集南海集雍益集諸刻是編又刪掇諸集
合為一帙相傳士禎所手定其子啟汧跋語
稱門人曹禾盛符升仿任淵山谷精華錄之
例鈔為此錄者蓋託詞也士禎談詩大抵源
出嚴羽以神韻為宗其在揚州作論詩絕句
三十首前二十八首皆品藻古人末二首為
士禎自述其一曰曾聽巴渝里社詞三閭哀
怨此中遺詩情合在空舸峽冷雁哀猿和竹

枝平生大旨具在是矣當康熙中其聲望奔走天下凡刊刻詩集無不稱漁洋山人評點者無不冠以漁洋山人序者下至委巷小說如聊齋志異之類士禎偶批數語於行間亦大書王阮亭先生鑒定一行弁於卷首刊諸

梨棗以為榮惟吳喬竊目為清秀李于鱗

見談

龍錄汪琬亦戒人勿效其喜用僻事新字

見士禎自

作居易錄而趙執信作談龍錄排詆尤甚平心而

論當我

朝開國之初人皆厭明代王李之膚廓鍾譚之
纖仄於是談詩者競尚宋元既而宋詩質直
流為有韻之語錄元詩縟豔流為對句之小
詞於是士禎等以清新俊逸之才範水模山
批風抹月倡天下以不著一字盡得風流之
說天下遂響然應之然所稱者盛唐而古體
惟宗王孟上及於謝朓而止較以十九首之

驚心動魂一字千金則有天工人巧之分矣
近體多近錢郎上及乎李頎而止律以杜甫
之忠厚纏綿沉鬱頓挫則有浮聲切響之異
矣故

國朝之有士禎亦如宋有蘇軾元有虞集明有
高啟而尊之者必躋諸古人之上激而反脣
異論遂漸生焉此傳其說者之過非士禎之
過也是錄具存其造詣淺深可以覆按一切

黨同伐異之見置之不議可矣乾隆四十六
年四月恭校上

總纂官

臣紀昀

臣陸錫熊

臣孫士毅

總校官

臣

陸費

墀

欽定四庫全書

精華錄卷一

刑部尚書王士禎撰

古體詩

對酒

對酒歌慨慷自我屬有生共得睹太平皇帝陛下惟樂
康官府治丞相無私人諸諫官彈射姦慝咸有直聲自
中丞刺史良二千石各各有廉名日南交趾皆我郡縣

蠻夷君長以時稽首殿庭屬國具為令文笥生翠來王
京幸太學三老而五更遂賜民爵一級存問長老遣都
吏循行大酺十日除宮刑美人曼壽百室豐盈

慕容垂歌 三解

慕容初入鄴已有虎狼志前驅丁零部後面鮮卑騎
燕燕尾涎涎飛飛啄塘蒲三原隔五峻緩急當奈何
慕容在何許已度涼馬臺饑鷹掣韉絛一逝不復歸

白紵詞三首

江南煙水多白鳬羣飛啞啞烟際呼美人窈窕為君娛
蜀羅吳縠曳華裾修眉星的眼且都明銓遙映丹脣朱
清歌錯落大小珠折腰流盼意態殊乍進欲退心躊躇
芙蓉灼灼迴雙趺仙珮丁丁鳴六銖燭殘月暗漏滴壺
宛轉為君開繡襦

青春遙夜開華堂綺羅絃管東西廂阿誰公子淮南王
美人家本邯鄲倡合蟬隨馬耀明妝起舞為君陳樂方
翠曾參差烟際翔鸞驚龍婉相頡頏西城北里各擅場

羅襖文巾紛御香明眸善睐含流光舞罷雲中孤月涼
若耶溪水勝瀟湘越川佚女春浣香織成白紵冰雪光
上為舞衣下舞裳大秦珍珠明月璫崑山玉撥映金梁
齊琴趙瑟聲鏘鏘七槃妙舞紛相當須臾璧月沉西方
汝南鳴雞啼曉霜今我不樂去日長裴回念此摧中腸
翡幬翠幄陳高堂請君安坐樂未央

擬美女篇

洛濱風日好美女出相望瑤象飾香轂玉軋鳴鏘鏘采

春蘭阪上弭蓋蘅皋傍龍輔節纖步鶯珠結明璫借問
女誰氏少小生平陽大姊入後宮次姊瑯琊王小妹雖
不貴夫婿直東廂出入冠駿驥天子侍中郎檻衣萬錦
費腰褭千金裝容華誠自惜貴盛寧易詳洛水正微波
明瀾一何長川路西南永扁舟不可方寄語盛年子顧
義慎自防

擬白馬篇

駿馬生代北少年出幽并結束各光采指顧風雲生朝

遊屬玉觀夕宿衛承明身逐孤兒隊名隸羽林兵行行
南山獵意氣何縱橫蒼隼決雲來飛矢逆風鳴大澤鸛
鵲道深雪狐兔驚迴瞻鸛雀門突兀與雲平鞍馬倏來
歸勢若浮烟輕昨夜羽書至貳師出邊庭上馬別妻子
鳴鏑追前旌舊隨冠軍伍復此河源行大漠少行人深
谷多鼯鼯朝飲沙上泉夕戍雲間城左顧疏勒服右盼
伊吾清無令都護將關外獨聲名

自石橋尋黛溪遂至摩訶峰下

日落山氣涼清流自迴轉窮源不知勞漸忘溪路遠幽
石各奔峭脩樹亦婉孌遙睇徑難測迴矚途屢變寂歷
衆山響蕭條晚風善微徑暮樵出懸崖歸鳥見須臾夕
霏收殘陽四山徧新月忽清揚餘霞自舒卷稍覺葛衣
輕幸藉孤筇健平生邱壑人茲言庶能踐

由柳菴踰西山最高頂至醴泉寺拜范祠

清境難久留申旦戒徒御引領睇前峰抗策辭東路數
武即嶮欽危蹊少安步顧盼見百里雲日媚烟樹憑高

俯澄湖風帆競孤鶩晴旭移峰巔明晦變已屢褰衣入
空翠溪流渺南注慘疎曠遊眺蒼茫失昏曙東山清風
來西澗涼雨度澄潭益蕭瑟游鱗紛散聚前賢跡已遠
山川緬如故夙昔思古人三歎讀書處

醴泉謁誌公像觀唐碑

碑開元三年乙卯立

早讀神僧傳緬希誌公迹劍水蹤已遙鍾山事成昔豈
知常白峰留此千年石鳥爪帶銅綠鏡面瑩薛碧磨滅
開元碑蟲鳥紛難譯披蘿究遺文剥苔理殘畫斷闕發

聞見樵牧增歎惜陸銘圯寒塚王碑委荒僻廬陵傲珠
犀東武比博奕淪棄多名珍何憚窮鉤索一勺醴泉水供
此風雨夕

神僧傳誌公面瑩徹如鏡手足皆鳥爪碑有云
陸倕製銘于冢內王筠勒碑于寺門皆與傳合

醴泉寺高閣瞻眺有懷范文正公

風雨湖上來蕭條灑飛閣殷雷起蒼際極目窮寥廓遙
天壓烟水空濛氣磅礴大澤盤蛟龍斜風偃鵬鶚卻眺
鴻濛中日光遠迴錯草木暗四山急淙鳴萬壑悵然思
古人大雅何時作

書堂

絕澗已千仞磴道仍九盤直上若懸溜縈屬勢難安右
顧踐鹿跡左顧憑鳥翰日落空山中蕭然風氣寒精舍
壁間出洞門天際看奇石壓巖戶孤立何巔岼突兀拔
澗底窈窕凌雲端入門度飛梁傍夕間驚湍幽軒宛初
構几榻皆峰巒頗意雷雨時雲氣生戶間諸天發鐘磬
星斗方闌干惆悵此靈境罩然懷懶殘

復雨

花枝濛濛日將暮颭颭涼颭起庭樹雨腳射地晝陰晦
急溜鳴簷不知數連年左輔嗟大無有蜚多糜仍屢書
良民重累背鄉縣奸民攻剽成萑苻天南干戈未寧息
男罷農耕女廢織長沙江中多戰船祝融峰頭尚兵草
羽書日日下山東秭銍轉輸動千億苦竹黃楓猿晝啼
舟子征人少顏色掘冢鑄幣既不能展轉呼天猶力穡
今年稍稍宜雨暘黍稷撲撲稻葉長長官鞭扑那敢避
努力公家輸酒漿

和窟室畫松歌

黃門園中有窟室背枕亞祿

名山

臨滄溟石壁磊砢一千

丈入眼髣髴生精靈橫壁老松誰所作海風怒攫山欲
傾盛陰五月凜霜雪怒姿萬變盤雷霆疑是溟渤含日
氣不然天上來星精我來盛夏變冬序白晝慘淡生晦
冥顛毛亂指舌上橋寒肌起栗心骨驚上下蒼茫有神
鬼左右騰跳飛鼉鼉江南吳生昔為此一下筆皆龍
形昔者吳道子畫壁天宮寺將軍劍舞何蔚跂興酣筆

落氣磅礴萬夫動色嗟神異吳生畫松已百載鐵幹霜
皮終不改南榮曝背亦吾儔偃蹇龍鱗好相待

蠡勺亭觀海

登高邱而望遠海坐見萬里之波濤長天寥廓雲景異
春陰偃蹇魚龍高怒潮乘風立千丈虎蛟水兕紛騰逃
羣靈潛結萬蜃氣一痕未沒三山椒頽曳勢盡潮亦止
波淡天清靜如綺菱苔沉綠紛塘坳螺蚌搖光散沙汨
叅差島嶼羅殊域紛如星宿秋天裏擊我劍聽君歌有

酒不飲當奈何日主祠前水蕭瑟仙人臺上雲嵯峨
門高誓不可見秦皇漢武空經過祇今指顧傷懷抱黃
腫慙鉗盡荒草人生快意無幾時明鏡朱顏豈長好吾
將避世女姑山不然垂釣蜉蝣島

周文矩莊子說劍圖

後有董宗伯
書說劍篇

古今人物畫手誰第一晉有衛協吳曹興南唐周生更奇
爲行筆瘦掣姿峻嶒此圖在世踰千載墨光黯淡生光晶
君王隱逸各有態蠶絲烟篆交迴縈目瞋鬢突五劍客

短後之衣曼胡纓二人旁立目左顧劒如星日光縱橫
昂首右顧者三士二人按鐔神欲生一人拔劒作虎步
怒如截兕吞長鯨使筆如劒劒氣出此公無乃能鐵兵
莊生說劒固豪快十步千里無留行千年奇論佐奇筆
揮毫潑墨皆飛鳴雲間墨妙更道絕鍾王腕底紛鬬爭
自云昔見吳興書說劒恨不作圖雙妙并今逢此卷信
神物又恨作書非趙卿徘徊三歎出金石煥然妙蹟如
神明我聞周生妙得後主作字法秋胡謝女風格清秦

淮花月汴京土感此傷人今古情

宣和御藏文矩有秋胡故實謝女寫真等圖

冬日偶然作四首

大史下蠶室坎壈誰見知發憤傳貨殖千古同悲噫郭
縱出鑄冶翁伯起販脂灑削既鼎食胃脯亦連騎志士
守蓬蘿不如交馬醫索帶披敝裘不如規魚陂

我愛灌仲孺意氣薄雲天長嘯入吳軍指顧堅壁穿長
戟鬱龍蟠怒騎如風旋聲名冠諸侯皆曰大夫賢魏其
勢既落田氏寵益專朝請考工地夕奪城南田丞相故

賓客顧盼忽屢遷笑罵顧四筵殊不直一錢當時膝席
子岌岌皆危冠

鄭季有孽子少小為人奴騎從平陽主給事建章居朝
拜大將軍封侯詫鉗徒遂復還尚主賜第耀通衢隴西
老飛將猿臂雄萬夫白首不得侯心折幕府書誰能對
刀筆臨風自捐軀天道有如此千古同歎歎

吾家有方平雅志託林壑拂衣早歸耕貂裘行採藥卜
築沃川墅垂釣上虞郭邈矣孔阮儔遐哉箕顙樂瑯琊

多龍鸞羨此雲中鶴

春不雨

西亭石竹新作芽
遊絲已冒櫻桃花
鳴鳩乳燕春欲晚
杖藜時復經田家
田家父老向我說
穀雨久過三月節
春田龜坼苗不滋
猶賴立春三日雪
我聞此語重嘆息
瘠土年年事耕織
暮間窮巷叱牛歸
曉見公家催賦入
去年暘雨幸無愆
稍稍三農獲晏食
春米穀賤復傷農
不見饑鳥啄遺粒
即今土亢不可耕
布穀飛飛朝暮鳴

春苧作飯藜作羹吁嗟荆益方用兵

蠶租行十解

丁酉夏有民家養蠶質衣釧鬻桑而催租急遂
縊死其夫歸見之亦縊王子感焉作是詩也

陽春三月時蠶子何蠕蠕三日出奩中五日徧簾條一解

東鄰有少婦養蠶方一塢夜夜伴蠶眠桑葉恐不周二解

朝出南陌頭猗猗望桑柔亦不見桑柔堪子醉鴟鴞三解

歸來見蠶饑徘徊當奈何脫我耳邊釵鬻我嫁時襦四解

阿夫持襦去里正持符來漢中索軍租不得還顧私五解

里正且上坐黽勉具晨炊但緩一月餘蠶成賣新絲六解

新絲亦難賣新穀亦難收不見馬上郎雉尾紅錦裘七解

再拜謝里正丈人且旋歸鬻我嫁時襦脫我耳邊釵八解

蠶應黑瘦盡軍租持底當痛哭視孤兒畢命朱絲繩九解

阿夫還入門不復見故妻生既為同衾死當攜手歸十解

懷古詩三篇

魯仲連陂

七雄既龍鬪陳寶歸嬴秦師出函谷關六國咸逡巡邯鄲日夜急咄嗟誰解紛蕩陰師既頓新衍謀豈倫先生畫奇策長揖平原君僕妾愧萬乘大義明君臣縱橫數千言顧卻虎狼軍功成不受賞飄然歸海垠蹈海既高義肆志寧辱身至今齊趙士個儻希清塵我來古陂上遺祠蔓荒榛臂道竄蒼鼠天風吹白蘋緬懷田巴語景行跂千春

顏觸墓

末世寡尚志薄俗希乘軒豈不貴纁帛形役神不全吾
高顏夫子抗節貌齊宣鐘簾寧足論殿上呼王前晚食
與安步詎以榮利遷監門良自賤趨士理亦賢俯仰二
千載弔古悲荒阡墟墓絕樵採清風激頽頑古道邈難
作悲哉東逝川

轅固里

漢初尚黃老儒術聞不章齊魯誕諸儒五經如載陽邈
哉清河傳卓為羣倫倡抵掌論湯武大義非荒唐曲學

誠孫弘微言詒后蒼訓詞列學官星日同琅琅我生睽
千載桑梓寧異鄉寤寐思哲人流風一何長生慙齊魯
學私淑附師匡

苦寒行

遠遊漁陽城飲馬滹沱渚河朔恒苦寒日夕風鳴悲悲
風起廣塗霜霰凋人衣欲渡川無梁層冰何壘壘鴟梟
鳴枯楊豺虎交路衢深谷多猿獠得食歡相追我行歲
既晏十步八九迷他鄉少親故相逢知是誰憂愁鑱肌

骨自顧顏鬢衰晚，眎飛蓬根隨風時轉移。我獨久伊鬱，歲暮空徘徊。寄語後來人，遠遊不如歸。

梁曰緝為言輞川雪中之遊

少志愛山水，夢想懷藍田。終南西峰下水石，餘清妍憶昔維摩詰。于此曾挂冠，揮手謝時輩。草堂常晏眠，輞水遶舍下。湖光明雲端，繩牀間藥鐺。清齋日蕭然，春鷗漸矯翼。夏木紛綿芊，時尋名僧會。自泛湖中船，嘆息古人沒。風物隨變遷，仙令妙文筆。慨然追昔賢，積雪曜巖阪。

秀色暖林巒數里入谷口石流已濺濺水鳥相哀鳴雙
垞渺人烟却登華子岡輞水猶淪漣花竹散已久亭館
供諸天王裴杳千載邱壑亦凋殘來者復為誰斯言良
足歎

慈仁寺雙松歌贈許天玉

我昔登泰山舉手攀秦松東南雲海幾千里夜懸日氣
開鴻濛山人出山已三載復見金元雙樹在獬髯石骨
青銅姿古貌荒唐閱人代長夏蒼蒼秋氣深風來絕澗

蛟龍吟仙人五粒不可見但有玄鶴來往飛陰森蚺
詰屈宛相向千曲盤挐氣初放一任支離拔地生那須
天矯排雲上我來高枕石壇邊耳畔往往聞驚泉白日
沉沉不到地颯然雷雨生空天煙色欲暝鐘復起雄談
岸幘波濤駛千秋萬歲知者誰閩海奇人許夫子

洗象行

水闌蒼蒼柳陰碧寶馬流蘓紛絡繹日中傳呼洗象來
玉河波射珊瑚赤須臾鉦鼓千雲霄萬夫聲寂如秋宵

虎毛蠻奴踞象頂邱山不動何岩堯岸邊突兀二十四
直下波濤若崩墜縱橫欲蹴黿鼉宅騰踏還成鸞鶴隊
乍如昆明習鬪戰萬乘旌旗眼中見又如列陣昆陽城
雷雨行天神鬼驚奴子胡旋氣適壯忽沒中流狎巨浪
撇波一躍萬人呼幡然卻出層霄上今年丞相收夜郎
扶南盤况求王章遠隨方物貢天闕屹然立仗金階旁
聖朝自不貴異物致此亦足威遐方黃門鼓吹暮復動
海立山移浩呼洶大秦師子多威神山林豈是天家珍

題趙澄仿王右丞羣峰飛雪圖

寒色冥冥下巖壑千峰萬峰雪初落瀑布無聲溪澗凍
紅樹微茫敞孤閣閣中有客方緼袍當盃氣與蒼山高
遙看飛鳥落何處如聞落木鳴東臯崖橫路斷少人跡
稍見老樵下巖隙高低遠近一溪通晦明合沓千重隔
右丞昔日居藍田山水落筆窮自然雪岡漁市盡高妙
藥瀨歌湖紛眼前此圖曾入宣和譜董巨荆關馬足數
兵火相尋六百年玉躡金題幾更主雪江老筆妙入神

臨摹古本幾亂真即教唐宋多能手未必常逢如此人

傅侯天馬歌

傅侯天馬身八尺風鬃卓立雙瞳方赤毛朱翼信龍種
神姿磊落形昂藏來從流沙涉西極玉山之禾偶棲息
意氣生能輕虎兕驍騰未屑循羈勒四蹄烏爪如鋼鈎
經過千里風颭颭虎身壯士控不得仰眎閭闔浮雲愁
昔日湖南始征戰軍中驍驍號百萬此馬振鬣始一鳴
歛如天上驚雷電一從罷戰歸中原三年不復從櫜鞬

漁陽落日下白草壯心更欲窮河源安得此馬飛上天
不須萬里遮窮邊即看郊祀陳天馬何減登歌太乙年

抱琴歌

嶧陽之桐何泱泱緯以五絃發清商一彈再鼓儀鳳皇
鳳皇不來兮我心悲抱琴而死兮當告誰吁嗟琴兮當
知之

宣和御墨枇杷圖歌

盧橘蒼蒼橫幹起故印依稀識天水風枝雨葉不關愁

慘淡如披靖康史宣和文物劇風流繡褫錦贖窮千秋
畫學歲收五嶽觀圖書盡識太清樓盛衰轉瞬如飛電
年駸岡上紛刀箭紫筠花木摧為薪西風落日青城殿
此本流離出禁庭過江千載嘆飄零昔日興亡如在眼
還同麥飯哭冬青

夜經古城作

我行牛山下寒墟帶平楚不見齊王宮空城半禾黍
星耿不明白楊夜深語

南園二首

曉起思園林昨夜西堂雨負杖眺前山初陽散平楚
池萍始合芳樹禽交語庭戶寂無人慨然念終古

夜雨雜花落衡門綠苔生誰能捉坐席共作林下行
荷舒午景茂林含夕清歸禽赴斜照稅駕此山楹

雨夜與禮吉叔子

高館多梧桐微雨飛向夕清談不能寐入夜轉蕭索
餘香歇幽幌暗蟲響堦石夢破忽沉吟悵然越鄉客

與周量過訪茗文夜雨共宿

故人千里別春草
萋已綠相思南雲端
目盡東海曲復作
帝城遊乘暇慰幽
獨入門涼蟬鳴中
庭多嘉木石徑生
積陰蒼苔宛山谷
坐久微風來雨聲
雜深竹共有滄浪
興復縱青山目良
會誰能常今宵得
同宿

贈勞山隱者

何許藏名地秦山
海上深半夜白日出
風雨蒼龍吟靜侶
行道處不聞樵採
音清泠魚山梵寂
寞成連琴曉就

諸天食暝棲蒼葛林因知安居法一契無生心我亦山中客悠悠悔陸沉

夜登燕子磯

渡江訪名山層巔到曛黑大江森欲動浩浩千里色把炬石燕飛燃犀潛蛟匿北望靈巖塔知是專諸邑悲慨下沾襟此意誰當識

宿弘濟寺曉登觀音巖眺望

擊楫凌滄洲投宿招提境入門優曇香聞鐘夜方永高

枕聽濤聲層軒抱江影曉來微雨過紅葉滿高嶺憑闌
見萬里雲物殊清迥長山去蜿蜒上流壓江郢海門控
金焦蒼烟翳朝景信美睇山川霸圖遞烟冷何如學無
生抗跡雲峰頂

寄彭十羨門

蕭寺鐘殘時燕山霜落夜對牀語清夕流連不知罷落
葉一紛飛離鴻遂南下湫浦近青山依稀見君舍

半山愛予寒江落潮之句為作圖愚山題詩其上

和答一首

我昨訪奇登燕磯
潑墨深更遍巖壁
捫蘿附葛不知險
夜踏空江欲崩石
掀髯作畫鹿裘翁
長歎題詩宛陵客
何當結屋圖中居
卧看江天落潮白

吳李子祠下作

我行延陵城懷古
心苑結讓德邈已
遠流風緬曩哲
州來季當立高懷
寧詎屑躬畊表遐
志亮哉子臧節慕
義永無窮穹碑字
難滅所悲於潛後
國亂相更迭伍胥
進

勇士專諸踐王血遜位固高義復命忍臣列春秋不名
賢書札理當嘶嗚呼三代後斯風久淪絕廉節起頑懦
尚論義常竊縞紵思古人空祠颯寒雪

毘陵歸舟

泊船西蠡河解纜東城路涼月淡孤舟遙村隱紅樹杳
杳暮歸人悠悠渡江去

招隱寺

筍輿越黃鶴連岡帶平楚歷歷南朝松風吹落寒雨石

楠紅始垂沙泉碧方吐遂造戴公山風氣何清古山門
映殘照雙泉咽寒嶼玉藥不復見空亭閉荒塢戴公昔
通隱風流照巖戶漱泉彈名琴東巡動人主清風一銷
歇初地留空宇金碧漸凋殘林壑自輕舉蕭條黃葉落
寂歷幽禽語迴澗起涼吹經堂罷齋鼓緬想剡中人蒼
茫久延佇

自招隱登夾山入竹林寺

籃輿俯高嶺石磴轉幽谷諸峯亂空翠澄江疊輕縠迴

望戴公宅秋氣益蒼肅紺壁隱奇杉危亭蔽荒竹孤僧
遠獨歸山鳥暮相逐樹杪見古寺松枯散林麓絕壁尚
千尋紆逕非一曲初蠟阮公屐逝將訪金粟瞑坐竹林
深山山靜寒綠

竹林寺

迢迢夾山道幽幽竹林寺林公闢山處泉澗饒古意鐘
磬聞諸天花藥覆平地森梢萬竿竹烟景滿空翠慈烏
識禪心清猿起愁思平生江海情蕭然但高寄回首禮

白雲何時謝塵累

林臯和尚塔院觀林公泉

祖堂白雲裏
蒼蒼俯林樾
昔人不可見
巖桂花猶發
惟
有林公泉
洎洎漾明月

海門歌

岷峨東下江水長
遠從井絡來
吳鄉奔濤萬里始一曲
古之天塹維朱方
北界中原壯南紀
魚龍日月相迴翔
中流一島號浮玉
登高眺遠何茫茫
長空飛鳥去不盡

江海一氣同青蒼山外兩峰遠奇絕雙闕屹立天中央
左江右海辨雲氣如為八裔分紀疆江流到此一縛束
早潮晚汐無披猖燭龍曉日出雲海山光照曜連扶桑
年來海戍未停罷戢舸大艦來汪洋胡豆洲前起烽火
徒兒浦上披衲襦古聞京口兵可用寄奴一去天蒼涼
我願此山障江海七閩百粵為隄防作歌大醉卧巖石
起看江月流清光

上方寺訪東坡先生石刻詩次韻

昔出蜀岡道黃葉鳴秋蟬今來上方寺綠萼破春烟坦
步寶帶側延眺隋城巔古刹龍象寂殘碣蛛絲懸緬思
我嶠人文米真神仙贈詩日南使賓佐皆豪賢邈然竟
終古漱墨留春泉老筆欲飛動妙態殊便娟空堂響人
語怖鴿飛聯翩後遊慨今昔憑弔當同然

寺有泉
名第一

京江夜雪

揚子津邊揚片席暮角聲傳京口驛北風一夜江上寒黃
鶴山頭雪幾尺去年曾上春秋樓蘆花楓葉當清秋何當

踏雪三山頂第一江山萬里流

甘露寺有宋吳琚題榜曰天下第一江山

丹徒行弔宋武帝

曲阿之北京口東寄奴王者真英雄
新洲伐荻殺龍子大業遂建丹徒宮
桓家小兒亂天紀投袂勤王夜中起
擣蒲百萬皆人豪龍行虎步非凡理
從茲大運屬彭城中原趙魏歸經營
硤口千軍五龍涸藍田一戰二嶠平
南北推移幾千載太息雄圖竟何在
宿麥寒原少昔人神鴉社鼓成空塞
王氣銷殘帝宅荒悠悠江水不勝長

忠臣徒嘆表開府天命還歸蕭建康

五人墓

流連虎阜遊宛轉山塘路石門映迴波英靈此中聚滿
壇松桂陰落日青楓樹生傍伍胥潮死近要離墓千秋
忠介墳鬼雄誓相赴酹酒拂蒼碑寒鴉自來去

自光福里入太湖口往聖恩寺

扁舟下西崦蓊蓊入湖口逶迤鄧尉山蒼茫具區數南
來仙靈窟表墓號稱首銅井連青芝雲錦張左右七十

有二峰遙矚皆培塿貝闕敞魚龍金庭開戶牖仙壇毛
公蛻古笈靈威守名境祕聞見勝遊信非偶巘嶸時合
沓龍氣殊蚴蟉擊楫泝空明濯纓遠塵垢將來萬峰寺
半偈持茗帚

還元閣聽雨懷太湖

冥冥遙峰雨黯黯重湖雲萬壑急懸溜颯沓聽難分山
中梅信發香色方氤氲已蠟阮生屐將墊林宗巾身卧
百尺樓心憶五湖濱笠澤渺千里漁邨雜鷗羣園綺緬

匪遙逝將返吾真

雨中尋米堆山

僧樓鳴鐘罷徘徊向山路遠眺米堆山蒼蒼積烟霧溪
澗窅然深岡巒緬非故千重脩竹林一徑江梅樹花香
上寒衲石流湓芒屨山靄接湖雲日夕自來去迢迢五
雲洞欲問誅茅處

自米堆山下行至上陽村錢家礪望湖中漁洋法

華諸山

杖策信忘疲行行畫圖裏崎嶇下雲壑蒼茫望烟水石
徑何盤紆踈籬照梅蕊寂落重湖濱柴門數家市居人
太古風但解數雞豕語我種植法敦樸有奇理雖非角
里儔頗謂桃源比逶迤到湖濬浩渺歎觀止震澤控三
江波瀾此方始法華表東陲漁洋正相似烟雨春空濛
峰巒暮倣詭昨朝梵天閣遠眺如隱几豈知方丈山忽
落芒屨底欲乞五湖長垂釣將已矣

晚坐雨花橋看梅

寒湖望已遠迢迢暮歸寺修竹隱山門金碧眩空翠清
溪枕飛梁花氣增明媚綠萼紛競發翠羽時一至拈花
悟禪心作賦識仙意高低垂繁條明滅見湖次縹緲吹
笙人消搖布金地微微蓮華漏蕭然遠塵思

登光福塔望穹窿靈巖諸山懷古

昨登擅勝閣遙遙見湖濱聚沙矚高妙珠露高由旬山
趾埋歸棹中流望嶙峋鈴鐸天際語獅象雲中蹲攬衣
造峰頂大千俯微塵悟彼解脫義得此清淨身名山繚

四隅出沒媚烟晨眺遠跡方遐懷古情彌罕采香已荒
徑菱歌尚含顰館娃一片石千載為沾巾迴身望胥口
落日悲孤臣

第二泉和涪翁韻

春山細雨三人俱藤笈親攜桑苧書縛亭甃石幾年事
至今浣沼噴明珠山人形癯味道腴九隲不老將焉如
軍持銅鉢此生畢買田即傍芙蓉湖

木末亭作

曉登木末亭南望新林浦烟嵐紛四圍三山渺何許
旭日麗飛甍雲物媚晴淑風景在江山離宮半禾黍顧瞻
金川門悲來不能語惟餘博士祠正氣留終古

守風燕子磯

刁騷夜雨打吳榜三日南風燕子磯安得滄波如匹練
便乘輕舸去翻飛長江巨石想飛動漁燈戍鼓相因依
栖霞咫尺不能到白下古城春又歸

憶虎邱鶴澗

清遠道士養鶴處人去亭空鶴不飛千古清冷一勺水
至今猶浸白蓮磯昔遊曾記仙靈語奇絕白雲翁欲歸
白雲翁欲歸青松忽
消半清遠道士詩也

和吳淵穎題錢舜舉張麗華侍女汲井圖

景陽樓上鐘聲止結綺閣中美人起百花溼露啼宮鴉
鹿盧曉汲銀河水黃奴慵起倚隱囊瓊枝壁月交輝光
貴人夾坐詩先就狎客擘牋歡未央玉樹歌闌方競媚
桃葉山前陳鐵騎青龍飛出建陽門羣鳥空呼奈何帝

可憐拂檻曉妝時入井倉皇那得知千載畫圖猶省識
石欄紅淚顰胭脂

和吳淵題袁子仁巴船出峽圖

桃花夜汎三川水蜀中估船日千里錦官城外指東吳
萬里行當自茲始金牛玉壘向天開朝雲突兀瞿唐堆
飛流一瞬千萬仞長年屏息顏如灰峽中無人但烟霧
杜宇聲悲客行處巴巫迎神歌竹枝忽見雲安郭邊樹
上峽懸橦下安流東風吹送江陵舟卻從一幅鸞溪上

髣髴三刀夢益州

葉訥菴自吳中寄子長歌兼示金山見憶之作奉

答

昔者我登浮玉山大江駭浪流潺湲岷我萬里在眼底
荆門郢樹浮盃間彭城蘭陵一朝盡令我慨嘆愁心顏
此時側望天北極漁陽莽蕩連雄關玉堂美人侍帝側
兩年不見飛鴻翼海內憑誰論素心夢裏思君見顏色
蒼梧慘淡雲氣深九疑絛邈瀟湘陰重瞳南巡忽寂莫

園花陵草俱沾襟聞道高陵變深谷即看碧海飛黃塵
雲霄侍從幾人在飛蓬落葉愁春心夫子盛年何婉孌
日夕含香玉皇殿衆中獻賦欲凌雲御前騎馬如飛電
即今蕉萃百不如落拓江湖復相見吁嗟哉人生遇合
亦偶然雄飛雌伏皆可憐不見東方曼倩號大隱金門
據地歌向天又不見開元天子盛文藻隴西王孫稱謫
仙調羹未罷夜郎謫至今青山采石垂千年君家況近
崑山麓二陸臺邊結茅屋放鶴朝從西鹿歸采蓴夜向

南湖宿感遇終懷國士恩憂時莫效長沙哭三山圖畫
一江分何日題詩共夕曛妙高臺上江如練南望姑蘇
是白雲

秋日題閔園水亭

南人習烟水結屋如舫居真州水木多城市通樵漁一
溪納三江潮汐相盈虛茆亭碧溪水浦淑臨前除曉風
斷蒲響夜露幽花舒孤雲散天末好鳥鳴午餘緬懷華
林歎持此謝簪裾

同楊西印副使蔡齡若秀才夜登觀音山眺曲阿

後湖

我昨南渡登金焦鯨魚跋浪生風濤更上君山俯震澤
長江萬里窮秋毫五日探奇興不盡曲阿城畔來登高
觀音山高高百丈星辰羅列捫層霄懸崖絕磴挂猿臂
崇巒疊嶂森松毛山巔作亭瞰飛鳥湖光山色相週遭
練湖一萬六千頃勢與江海爭迢迢淵注渟著古所歎
滄桑磨滅非前朝風景不異謝郎死我來憑眺凌寒宵

長嘯空山峇山鬼驚飛鵬鵠求其曹滄波混茫接元氣
有如盂水浮堂坳冰夷擊鼓百靈集金支翠羽光飄搖
是時月黑風怒號萬弩突射錢塘潮蛟龍扇顛時隱現
靈胥慘淡天吳驕高麗長山互鉤帶六州一氣迴斗杓
楊公蘄黃昔開府坐清江漢真人豪蔡生白哲美無度
頗能飲酒歌離騷東吳菰蘆有君輩力鞭巨石驅神鼉
練塘一勺好栖托結隣未卜心空勞酒闌歌罷意惆悵
烟江明日橫輕舸

九日與方爾止黃心甫鄒訐士盛珍示集平山堂

送方黃二子赴青州謁周侍郎

西風蕭蕭天雨霜
秋高木落當重陽
鷓鴣先鳴蕙芳歇
雁門鴻雁來何方
今我不樂出行邁
西城近對平山堂
歐公風流已黃土
舊遊寂寞風烟蒼
喬木脩竹無復在
荒蕪斷隴棲牛羊
劉原父蘇到日已陳跡
况復清淺論滄桑
桑京江南望流湯
湯北固山高枕鐵甕
蕭公旌旆何飛揚
雲龍直北雲茫茫
彭城戲馬啟高宴
至今邊朔傳名

章孤蓬驚沙振叢薄哀螢蔓草纏雷塘從來王霸已如
此牛山何必霑衣裳與君並坐但鼓瑟醉倒聊復呼葛
疆樽前聚散况難必羽聲變徵何激昂明朝送汝望諸
澤欲趁桓公作急裝

登文游臺

玻璃江上謫仙人東來萬里辭峨岷熙寧元豐不得意
翩然戲弄淮南春龍圖學士孫莘老忤權要祥符宰相餘王

孫

王定國

黃樓一賦軼屈宋無雙國士推髯秦

少游

四公相逢

向淮海酒酣耳熱氣益振珠湖三十六陂澤高臺下瞰
何嶙峋錦繡詩篇照天地與臺光景長鮮新烟雲過眼
一飛鳥黃河曲注江東奔人民城郭半遷改此臺屹立
當湖濱惠州儋耳垂萬死後生望古傷吟魂何人請籍
元祐黨至今泚顙慙安民豈如此臺好名字永絕狐鼠
芟荆榛我来遊眺歲幾度溪毛明信古所敦遠帆如鳥
樹如薺湖光雲霧相摩吞嚴冬沆瀣但一氣大雪片片
鋪龍鱗酹公一語公莫嗔作詩一笑君應聞

末即坡公題
太白像語

過汜光湖懷古

嗚呼正德中，嬖豎隳皇綱，華容既避謫，劉謝咸高翔。談笑誅刑餘，臺閣資文襄。逆濠睨神器，弄兵下鄱陽。勢異北平順，跡同吳淞狂。桓桓文成公，將帥皆龍驤。義旗出章貢，狡童旋已亡。如何萬乘尊，南巡來建康。羅綺照江水，姝麗傾淮揚。誰賡白雲謠，載詠黃竹章。茲湖兩駐蹕，名因翠華長。龍舸與鳳艗，樂哉方未央。膠舟古所戒，遺恨憐昭王。事往二百年，寒波但菰蔣。月暗津鼓急，楓落

漁燈涼緬懷豫且歎弔古重悲傷至今秦陵樹松柏無
斧斨

夜遇陳伯璣即別

聞君返西江崎嶇歲將暮不知秋浦歸復此吳陵遇烟
暝失漁邨雪消數江樹惆悵聞荒雞別君立前渡

蘇門行寄劉公馥兼呈孫鍾元先生

劉生俠氣老不除腰間玉具纓曼胡目送飛鴻卧西省
晝夢秋水思菰蒲掉頭一竿清潁尾琉璃萬頃堆西湖

憶昨聽爾御風掄山泉挾溜松風呼黃鵠山頭一握手

戴公往蹟今有無山中舊約息壤在相看一笑言非疎

舊在京師聽公敲彈御風操贈詩有與君更作他年約黃鵠山頭訪戴行之句壬寅果相遇黃鵠山下此事甚奇

濤頭如山五馬渡酒酣夜別黃公壚平山堂上望汝潁

恨無好句追歐蘇昔與汪琬程可共槃礴看君寫作

蘇門圖恠石槎枒樹蕭瑟醉墨絕似雲林迂嘯臺鸞鳳儼

在耳安知嵇阮非吾徒聞君近散萬金盡便衣掃塔辭妻

孥山中有鄰德不孤蘇門先生今大儒夏峰邨邊看秋瀑

雲中髣髴開精廬尋源采藥去不返空留鳥跡巖間書
廣陵西望連孟諸倘逢樵叟一相訊山中服食今何如
覽湖舟夜讀渭南集偶題長句

少陵不作昌黎死大峨仙人落儋耳渭南老子來堂堂
鬱律蛟龍蟠筆底半世功名梁益間拓弦橫稍劒門關
白頭鏡水江湖夢夜夜山南射虎還

陸放翁心太平菴硯歌為畢通州賦

娥媚散花峽艱危道士磯放翁過此留清辭何年片石

墮寥沈龍堂荒忽蟠蛟螭先生當年西入蜀迎風十丈
牽黃旗下牢夔門波浪惡白鹽赤甲天下奇轉入興元
瞰河渭山南射虎黃雲垂大散關頭見烽火賦詩草檄
如星馳此硯爾時伴戎幕賢於十萬熊羆師鶯花海中
九年住春江醉捲千玻璃錦官城裏蘋風閣百觴萬首
爭淋漓此硯爾時廁高譙飽霜千兔相追飛先生老矣
竟東下鏡湖支枕看風漪但餘此硯共幽獨猶能起賦
從軍詩紹興淳熙一片石流傳異代誰使之曾窮梁益

掠吳楚

放翁金崖
硯銘中語

吾曹想像空嗟咨畢侯家近蠻堂側

草生書帶紛葳蕤劍南一卷不離手興來春日吟茅茨
攜渠歸去坐懷古定有雲霞生墨池

卞忠貞公墓下作

松柏何蕭蕭云是卞公墓背踞冶城顛前臨大桁路緬
昔永嘉時流人競南渡舉國扇清言作達相矜慕惟公
執鄙吝巖巖畏峰距一朝荒倉來旌飛歷陽樹取節慚
王公種薤笑諸庾堂堂卞將軍授命青溪渡父子忠孝

俱大節光國步快意溫平南屨及雷池成一戰翦長鯨
鐘簏仍如故握爪識忠貞死綏表風素英與載雲旗陟
降神靈雨咫尺袁司徒異代同金鑄

宿長干寺

支公邀我宿清夜開南軒龕燈照維摩跏趺寂無言下
簾啟北牖山夕烟景昏中夜微風作涼雨灑林園宿鳥
稍驚起時聞嘉樹喧枕簟生夕涼鑪香歇微溫勞生疲
津梁聊息應對煩

六朝松石歌贈鄧檢討

壽陽太史好奇古邀我來觀六朝之松石不辭重墊一
角巾此生當著幾兩屐入門大叫走欲顛袍笏淋漓狂
太劇蟠根近連瓦官寺吹香正鄰虎頭宅蒼皮黛色磨
青銅老幹樛枝拓金戟蕭梢上摩白日暗輪囷下瞰蒼
烟積千年為髻誰得見已有脂香化靈珀石勢嶙峋不
相讓元氣盤盤絕繩尺蒼苔剝盡南宋字劫火不受陳
宮厄

陳叔寶
三品石

終南太華若在手咫尺壺中苦崩迫誰遣史

書宋星隕將無神受秦鞭斥晦冥豈非鬼物庭風雨當
防巨靈擘王謝衣冠失江左齊梁人代成今昔建康宮
殿幾青燐此石此松閱朝夕一物亦荷皇天慈懷古茫
茫百憂集擊琴欲罷且高吟謾謾寒風灑巾幘

金陵曉發

月落驃騎航潮生鎮西宅濛濛遠林樹烟景紛如積煙
際下漁舟樹杪帶行客何處金陵思秋江葦花白

陳生行戲送其年歸陽羨

陳生陳生爾既不能入淵斬長蛟又不能登山射猛虎
復不能亡賴作橫苦鄉里十載哦詩守環堵徒抱輪困
一片心藜藿鼪鼯相支柱昨日渡江來今復渡江歸運
租船上苦憔悴風高浪湧橫江磯朝來寄我新詞句明
月無情蟬鬢去五湖歸去伴漁竿楓岸蘆汀不知處李
鷹鱸膾思江東我亦年年嘆轉蓬期汝扁舟同射鴨銅
官山下竹枝弓

江上讀韋詩

彈琴向空江夜靜見江月水波正遙裔河漢坐超忽五絃泛波濤餘音散林樾沙邊鶴唳遠烟中人語歇何處楚山青孤帆遠將沒獨有韋公詩依依伴清絕

蕭尺木楚詞圖畫歌

大江秋老歌離騷江波瑟瑟風刁刁恠石龍從壓崩濤猩猩歎雨悲猿猱楚纍一去二千載使我後死心勞忉鬻桑敗盟西帝驕商於六百橫相要武關一入不復返章華臺殿生蓬蒿江潭憔悴子蘭怒蛾眉謠詠羌安逃

長楸龍門望不見木蘭桂樹棲鴟梟騏驎不御愁踟跳
萊施薊紫糝申椒呵壁荒唐罷天問沅湘西逝蒐難招
蕭梁王孫筆佹僑攀挈顧陸提僧繇丹黹粉默寫此本
墨花怒捲湘江潮湘君夫人降荒忽國殤山鬼來蕭颼
青楓斑竹染啼血靈風神雨紛颼颼酒闌歌罷老蛟泣
星辰迸落江天高

宿弘濟寺

名藍敞積翠遙夜開禪關山半聞清鐘夢覺心亦閒飛

雨灑江介流雲滿空山五載復投止塵勞慙昔顏

黃子久王叔明合作山水圖

有客示我七尺練云是黃王之合作粉墨駸蝕神淋漓
巖谷高深氣盤礴長林巨壑來畏佳飛鳥流雲去寥廓
空堂白晝生風霆飛瀑千尋競噴薄老松撐突夜叉臂
恠石縱橫驚鸛啄石稜松鬣若無路忽向青冥得樓閣
峭壁無梯猿臂絕天外孤茅誰所縛滿堂動色神悄然
題字依稀辨黃鶴吳興清遠鷗波亭家法賢甥宛如昨

意匠慘澹經營成范緩倪迂大張拓富春老人年九十
煙雲供養窮三樂扁舟訪舊雪川來偶從縑素論邱壑
為添樵徑螺髻旋遶峰一角空中落遠人無目樹無枝
妙解通靈失糟粕吳興富春幾百年此意天然殊斧鑿
山人癖如阮宣子蠟屐猶堪代芒屨惜無劉尹買山錢
苦向畫圖耽寂寞此中三日容坐卧便擬拂衣永棲託
明年偕汝春晝閒梅老無花竹生籜

精華錄卷一

欽定四庫全書

精華錄卷二

刑部尚書王士禎撰

古體詩

鑿江大雪歌寄家兄西樵

夜聞戩發曉漾潏衝寒四顧江天朗雲氣欲壓揚子津
濤頭直突仙人掌平生愛雪勝瓊貝况復橫江發奇賞
朔風獵獵犯貂裘急霰霏霏灑烏榜大澤蛇龍避寒蟄

高天鵬鵠盤空響江南羣山張畫屏玉笏嶙峋袤百丈
隔江心馳茅山洞咫尺波濤絕來往遙憶茅家好兄弟
驂鸞騎鶴三峰上學仙不能且學劒耳後風生致慨慷
西郊大道接符離霹靂鳴弓穿宿莽玉腕神騶氣清峻
金毛胡鷹颯蕭爽雄狐狡兔那得避雨雪風毛灑原壤
橫吹聲中歌競病據鞍盤礴真吾黨歸來一笑卧煙篷
浙浙江風吹五兩

南將軍廟行

在泗州南公
霽雲乞師處

范陽戰鼓如轟雷東都已破潼關開山東大半為賊守
常山平原安在哉睢陽獨遏江淮勢義激諸軍動天地
時危戰苦陣雲深裂眚不見官軍至誰與健者南將軍
包胥一哭通風雲抽矢誓讐已慷慨拔劍墮指何嶙峋
賀蘭未滅將軍死嗚呼南八真男子中丞侍郎同日亡
碧血瀾斑照青史淮山我我淮水深廟門遙對青楓林行
人下馬拜秋色一曲淋鈴萬古心

家兄信宿焦山有寄

聞君游松寥託宿招提境佇待江潮生茶香酒初醒松
風流夕梵蘿月散清影暝坐歸鳥稀晚飯鐘魚靜昔遊
不可忘夢向焦仙嶺

焦山古鼎詩同西樵賦

曉入枯木堂恠禽驚翩翩清露滴松杪下見古鼎蹲寶
光耀昆吾中有飛廉魂上文為雷回下文為雲紘獐狀
饕餮伏兵氣蚩尤昏辛壬與丁甲世次迷夏殷初疑周
虎彝復惑虞雉敦尊從不可辨牛豕誰能論瑰怪壓綠

鼎譎詭旅紀甌蛟龍雜蚪蚪五指不敢捫在昨想翮翮
識字驚蜿蜒月黑鬼神泣峽東波濤奔籀書失趑趑斯
篆摧窺軋史游久已沒皇象不復存不遇博雅流孰為
洗煩冤諒彼岐陽狩或同泗水淪山僧與道古感激聲
還吞分宜昔枋國氣勢傾崑崙斯鼎出京口上燭光網
緼役使萬指衆負載千蹄健大哉宗廟器詎屑豪貴門
威力鎮禪窟寂寞歸祇洹午夜鳴鐘魚清晝啼猿閱
人恒沙劫如彼蟲在禪我昔訪焦先望氣齡不言五年

金史四庫全書
陽揚子無翮思騰鸞吾兄癖好古八書探河源三日松
寥遊坐卧忘囂喧扁列析螺書卷尾搜蠆文作為奇偉
辭大海搏鵬鯢春江壯風霆響激雲濤渾三嘆繼高唱
海門上朝暾

送家兄同無言遊吳越二首

挂帆指吳會雲水空濛間上巳美風景登臨散襟顏湘
湖萼正滑應上蕭然山共訪金庭宅淹留殊未還

吾家王吏部江左有高名五字論詩品陰何欲比清偶

思鏡湖好忽作剡中行
輪爾天都子逍遙訪赤城

上巳辟疆招同邵潛夫陳其年修禊水繪園八首
前年曾到湘中閣閣外天寒水方落西風颯颯猿啾啾
惜別懷君芳杜若今來三月青春深浯溪窈窕桃花林
為君一曲答欸乃寫作雲山韶濩音

碧琉璃上雙玉壺蘭橈宛轉沿春蕪未傳洛下羊酪法
且醉淮南櫻筍厨射雉城中煙景暮流鶯喚人且須住
回頭笑謝襄陽兒詎可搖鞭背花去

平山堂下五清明

甲辰紅橋賦
治春句也

草長鶯飛無限情不怪老

顛裂風景名園上日相逢迎銀箏初彈阮初擘此夕留

髡應十石春衣明歲杜陵遊憶汝狂歌拓金戟

西豪里中訪老友况復陳生與我厚辟疆園敞羅羣賢

大兒小兒唱銅斗烟際鷓鴣一隻飛吳歌水調欲沾衣

風光如此不成醉帽影鞭絲何處歸

陳公家近罨畫溪溪邊花草令人迷離墨山中一宵雨

竹雞白鷓鴣相應啼先生大隱隱城市萬壑千巖牕戶裏

花朝已過上巳來日坐蜻蛉釣沙尾

迴溪綠淨不可唾碧蘿陰中棹船過落花游絲春晝閒

獨許先生此高卧劇憐風物共披襟蕭然絲竹皆清音

永和三日今千載坐使清風滿竹林

時出文衡山
蘭亭卷同觀

暮春三月為水嬰棠梨葉大山禽啼田家社酒壓缸面

雪白橙香玉練槌夜聽醉頭滴春雨曉報提壺如潑乳

醉鄉大戶百分空起喚花奴自撾鼓

谿研一徑略約紅地肺疑與朱陵通沅湘春水蒲桃綠

金少隱先生集 卷二
江籬蘭杜愁烟空主人少年登嶽麓祝融峰頭幾迴宿
七十二峰羅戶庭日汲湘潭燃湘竹

再泛水繪園看月作二首

林塘自幽映况復清夜月輕舟漾浦溆習習涼飈發竹
深禽響亂徑僻人蹤滅島嶼已千尋川途更百折月影
散水木光景紛竒絕孤蓬泊烟霜澄懷抱冰雪我有素
心友掩關事禪悅噉粥日消散觀道離言說示我秋水
篇邈然寄寥汰遠寺傳鐘魚空山鳴蜻蛚流連印渚游

惆悵林中別

脩林帶高館，巖壑相因依。
水波澹瀟瀟，照雲霞收夕霏。
遙遙暝色來，肅肅沙鳥飛。
永懷謝希逸，望古歎知希。
斯人不可作，乘月扣舷歸。

雨夜懷其年園居

久客春向暮，歡游罷不適。
孤館歇清漏，卧聞春雨滴。
暗蛩吟幽草，寒燈耿虛壁。
念我同心人，咫尺何由覲。
雨聲湖上來，蕭條散蘆荻。
此時掩關卧，應聽林間笛。

雨登湘中閣眺望

曠望臨清湘楚天夜來雨合沓連江潮空濛散洲渚野
鳬溼不飛墟落遠堪數漁榜沿迴谿停橈飯孤嶼不見
烟中人但聞烟中語

詠史小樂府二十四首

望望北邙坂黃蒿長似人夜來螢火暗失路小平津
欲得卿曹拜何妨破產求蒲桃原不惡一斛博涼州
長揖橫刀出將軍一代雄頭顱行萬里失計殺田豐

祝衎復祝衎君聽殺雞歌瓜廬方一畝漢臘此中多
生女不如男所論非英雄不見龐娥親殺人都亭中
太息王髦劒前年失孔融曾言赦雍齒地下愧袁公
一作崩城標三軍且莫哀丹陽使君婦衰經報讎來
可憐卿慚長陳德何涼薄不及朗陵公猶有荀文若
子義來江左青州名士稀丈夫死知己枉用寄當歸
將相江東美英風壓上流魯公最忠烈慷慨借荊州
獬兒健如虎高步跨江東孝廉殊斌媚人說紫髯公

腹痛思前事分香惑後人二喬得佳婿不是洛川神
赤壁戰堂堂綸巾繡襖襠元戎在何許顧曲有周郎
濡須高會日諸將在轅門醉袒貂裘看斑斑刀箭痕
龍鳳全歸漢三分指掌中惜哉雒城戰失此半英雄
魯國真男子關西社稷臣阿瞞渾自可滿寵爾何人
大義辨國賊吾欽趙順平寧須法孝直方可制東征
足堪加帝股故態笑狂奴何如朱盪寇直將大王鬚
邴管持風節高名合作龍何人工賣國老竊博平封

費公能辨賊嚴駕且圍棋賭墅東山者風流自汝師
生乞步兵厨死埋陶家側一時兩酒人亦足張南北
石馬來張掖公然大討曹可知北部尉典午啟塗高
今年賜劍履明年假黃鉞可憐青頭雞躊躇不得發
吳漢分龍虎終憐石子岡何如綿竹戰父子死堂堂

登天闕望金陵懷古

我登牛首山天闕何屢屨上造青雲端下瞰無端倪壯
哉六朝都佳麗誠在茲龍虎氣盤鬱將相羅雄姿緬思

赤烏年爰逮太元時五馬浮渡江一馬獨權奇桓桓始
興公募府陳軍麾懿此帝王宅雙闕衛京師青山似洛
陽大江環四垂智力邈千載興廢如奕棋江山看不殊
俯仰自生悲北眺玄武湖蔣山蔚蔽之博望峙西南列
戍多旌旗時清興偏安憑弔將奚為落照橫江流萬里
天風吹壯心不可已淚下如綆縻

龍潭登舟棲霞僧相送

昨朝山中雨惆悵中峰別回望上方人雲嵐但明滅龍

潭復相送江晚潮如雪
瀏瀏巖際風皎皎波間月
世外本忘情幽懷無斷絕
終卜僧紹鄰長茲味禪悅

淮北晚行寄廣陵故人

南風吹五兩浙浙乘潮便
綠波蓮浦漲白露蘅皋遠
稍看烟景夕篙師施樓飯
不見廣陵人含悽詠江練

寄宗定九

東原讀書處夏木紛成結
江潮門外落烟岫牕中列
誰言謝公埭復作零陵別
懷中團扇詩睠此清秋節

分賦得館娃宮送子吉編修歸吳

館娃宮中花蘂紅
美人白紵嬌
春風館娃宮中烟草綠
蝴蝶雙飛井欄宿
回首穠華能幾時
羨君一舸逐鷗夷
五湖淼淼烟波濶
何處黃金鑄范蠡

又賦得角里村

笠澤濛濛水烟夕
細雨丹楓浪頭白
先生去後幾千年
角里之名今尚傳
玉堂晝卧夢烟水
卻挂扁舟尋角里
我亦江湖舊散人
蓴鱸思逐秋風起

昭陽顧符稹畫棧道圖歌

顧生畫學李思訓尤工棧道兼騾綱丹青金碧妙銖黍
近形遠勢窮毫芒褒斜山色一千里子規啼處烟蒼蒼
女郎祠邊人跡絕但見哀猿連臂叫嘯青崖傍江水如
油下南鄭閣道似髮通陳倉紅氍毹背笠覆首人物結
束疑唐裝車馬班班入雲際如蟻緣垤相扶將秦川渭
水望不到蠶叢直上天茫茫仰家扇子冰雪色一莖斑
竹磨瀟湘如何方寸懷裋裏宛然置我蜀道青天長楊

一益二古天險誰周
鬻國謀非臧阿瞞
四紀作天子青
驪西幸何倉皇
三十年来蜀道塞
况從古史論興亡
因君妙蹟發遙慨
如聽鈴聲替戾岡

送陶季之潞州

先生昔日登武夷
鐵船峰頭看奕棋
中冠離支三百顆
酒酣自劈輕紅肌
峰頭爛睡忘甲子
坐笑曾孫生白髭
張帆伐鼓下黃鶴
欲濫三湘窮九疑
披襟蘭臺發高唱
快哉不辨風雄雌
平生名岳履齒遍
風塵京雒嗟衣縑

投我奇文浩千頃蛟龍大澤纏躩踞謂我四海一知己
譬若莊休從惠施高齋茗飲坐清晝風爐活火分槍棋
我時無事似犀首酒鱗浮動銀留犁豐臺紅藥花照眼
驪駒忽告將西馳壯心猶作驥伏櫪適志無如泥曳龜
我聞上黨天下脊當年潛邸傳臨淄飛龍荒宮沒烟莽
斷碣髣髴開元詞紛紛梁晉夾河戰鵠兒萬騎陳軍麾
錦囊負矢盛意氣歌聲慷慨留三垂時平不用弓箭手
空老昭義千熊罷戰場下馬問亭長鬼燐颯颯寒颼吹

君家草堂臨射陂門前五柳藏東籬何時單舸徑歸去
壯牕高枕談黃羲

送朱秋崖歸安宜兼訊陳冰壑

北平太守老不封身經百戰關強弓平陵岸頭爾何物
李蔡為人居下中昔者應侯未入秦折脅摺齒難為容
一朝西行取相印故人馬食何怱怱丈夫不遇且蓬累
古來雄俊將無同愛汝朱干草堂好甍社湖北如吳淞
釣船春入鰕菜市柴門晝掩菰蒲漿據梧時復同惠子

上冢聊爾隨龐公當年我作淮南客落帆屢及桃花紅
兒童習見鵞鴨熟濁醪為我來牆東此邦佳士復有幾
稍從湖海知元龍唱于唱喁樂復樂大湖漠漠來天風
自別淮南老鞍馬筆墨蕭颯如秋蓬眼明乍喜故交至
劇談往往連晨鐘聞君此行意惘恍五湖春水磨青銅
夢隨白鷗沒浩蕩覺來目送南飛鴻歸逢陳鈺相問訊
余方袴褶騎黃驄

送周量同梁芝五游西山

西山香山妙無比一道飛泉萬松裏馬曹自矜能拄笏
不知落汝芒屨底猢猻藤子青銅堅為汝一日窮緣攀
遙想空山下風露嗒然坐對開禪關

膠東張雉畫葛洪移家圖歌

下簾卧清晝遠夢生羅浮覺來北堂上素練橫滄洲依
稀三萬六千丈風吹絕壑紅泉流何人攜持雜負戴全
家避地來山幽先生身騎烏犢牛丹雞白犬隨行輶鮑
家小女兩丫髻手把芙蓉居上頭惠懷之際那可道萬

乘不洗金塘羞王家寧馨失三窟華亭鶴唳悲清秋回
首銅駝洛陽陌名士對泣新亭囚伏波將軍不受賞丹
砂欲就來交州大鵬詎可伍鷓鴣跛鼈坐笑追騂騮張
生妙筆擅黔陬令我逸興生丹邱夙昔讀書慕仙意望
而不見中心愁十年婚宦願粗畢青鞵快作逍遙遊刀
圭為我留井竈此生未作坳堂舟

送同年袁秋水僉事覲事畢歸甘州

白馬黃金柑蹀躞思邊疆河西四郡天萬里中分弱水

臨河湟漢家天子重邊冊大開張掖連燉煌陽關以西
盡亭障屬國一氣通諸羌遠求汗血厯絕域玉門使者
遙相望輪臺之悔復何補弛刑十萬空雄張首藩離宮
待天馬蒲桃大郡酬伊涼至今祁連古邊塞控弦士馬
多精強衙帳雲屯襍回鶻部落星散延燒當當年武皇
用兵處傳烽高並天山長祭酒布衣諸生耳虎頭食肉
何昂藏紅鹽池邊開幕府羌女如花羅酒漿安西都護
受成事戍已校尉停秋防使君能令金作粟使君能使

馬如羊使君今且為急裝還報

天子開明堂特賜安車圖未央五星歲歲臨東方

傳經堂歌送卓永瞻歸浙西因寄火傳

中原喪亂連天崇鑿蹄驕馬嘶江東昭陵玉匣出隧道
鴻都祕策飛秋蓬小作勝囊大帷蓋石經三體皆磨礱
卓家世德不可紀侍郎謀國真公忠巢傾卵破悔不早
曲突徙薪誰謂功革除事往三百載至今化碧千長虹
聞孫抱經隱茗雪千秋人識梁邱宗清廟明堂列球貝

深山大澤藏蛇龍我慕慈淵生苦晚晚及孫子相追從
雄才能慮五石瓠大力欲挽千鈞弓桓榮稽古累數世
郎君人地將無同昭氏鼓琴有妙理誰云竟以文綸終
至尊通經過漢代會開東觀臨三雍白虎諸儒考同異
如懸大簾鏗洪鐘郎君攝衣作都講雅歌殿上何雍容
野夫窮經不得力坐使尹季傷瘖聾他年登堂問章句
五湖帆影隨樵風

述舊贈劉公戡吏部

昔在順治中天府羅文昌

至尊右儒術海寓盛詞章夫子起汝南高步翰墨場僕

從稷下來意氣猶蹶張雲龍歛然合相逐共翱翔論文無

躡嚅結交多老蒼四海得汪文荅程周驤首同周行一臺稱

二妙籍籍董虬玉與梁曰璋射必有邸玉卮豈無當窮秋

八九月草木萎以黃憑吊望諸君驅馬金臺傍風雲

慘營平邊朔多嚴霜和歌猛虎行天地為低昂時序

一以變良會誰能常君思潁西湖歸尋兩歐陽諸子亦

星散各各之四方僕觀廣陵濤時上平山堂側聞清潁
水嫩綠如瓜瓢小艇擬艤舫往往破湖光別業寄蘇門
水竹紛陂塘百里見黃華神工肆皴皴飛瀑下千尋灑
落層冰涼熊岳所居處瑰異不可詳破衲山水紋蕭然
居士寢真江五馬渡暮雪天滄浪是時一握手泥飲傾
千觴豈知十載別會合仍

帝鄉羣公更翕集列宿森光芒翰林蔣與李誅蕩排天閭
亦有陳與吳鳳凰鳴鏘鏘雅歌出金石高論窮羲皇夫子正始

音卓為羣倫倡僕忝龐公交時登元龍牀小春風氣佳晚菊
有餘芳賓從會西園絃管羅東廂援毫申此詞勗哉毋相忘
世祖章皇帝御畫渡水牛戲以指上螺紋成之臣從黃

州通判臣宋犛得觀恭賦一章

章皇握乾符武功燁旁魄乎齋春晝長游藝睠圖籍
泉壑窮窈窕烟雲羅幽蹟寶繪賜近臣往往等球璧
常從青箱堂

奎藻觀赫奕營邱及河陽到眼堪一擲想見憂勤暇勝情

寄山澤戲作渡水牛生態妙盤辟肉怒垂星圓筋突陰虹
直脰似滿黃鐘角堪扣白石彈指九牛毛森疎如刻畫水
波稍演迤浮鼻未沒脊髻髻綠楊風掩映春蕪碧神武十
八載文教洽重譯干戈與弓矢包用黃牛革小雅賡宣王爾
牛何濕濕旒旌牧人夢考牧周官職應知翰墨餘與世登社
席龍髯去已遠謳思徧荒僻雲漢爛天章典謨布方策
聖主念紹庭率由正無射小臣沐皇風流涕記飛白

為宋牧仲題林良宮娥望幸圖

杏華春水團宮纈宛宛驚羣白於雪林良好手二百年
犀軸飄零見奇絕太平內則徧閨檐宮漏迢迢響夜籤
何處離宮三十六金羊空望竹枝鹽

送楊鄂州職方奉使安南

于闐玉帶橫腰身猩紅袍蹙金麒麟使者青霄下千仞
旌節遙臨日南郡日南郡縣古交州唐家都護天南頭
大長叩關奉朝請比于佩印為通侯咫尺高平亦王土
誰使穴中鬪羣鼠要令萬里靖烽烟先見兩階列干

羽楊郎意氣不可當談兵畫省神揚揚雄才常擬略
矜壯心更欲規河湟此去烏蠻過銅柱曾是伏波用兵
處即看金馬獻彤庭不用飛鳶愁毒霧朝來祖帳城
東門羣公冠蓋如雲屯虎頭食肉志亦得新婦惟車安
足論

送米紫來令建昌

南風吹船健如鵲一月飛渡西江灣名流正得山水窟
雲中五老玉孱顏畫禪書聖兩無敵官閒潑墨東林間

風流海岳菴中客直取廬山作硯山

晨起為錢宮聲題長橋烟雨圖

松枝塵尾壁角懸桃笙火出晝不眠長安五月旱太甚
自郊徂宮空告虔昨宵新涼生枕簟五更簷溜聲奔泉
大江萬里瀉春漲濤頭泛泛何溱溱豁如毛摯去酷吏
身傳兩翮思騰騫坐憶江南此時節流水決決鳴稻田
錢郎打門送急遞鼠鬚煤尾交雲烟青松短壑妙結構
高厓巨瀑紛鉤連長橋烟雨更奇絕空濛似欲無山川

濕蓬折疊緯掠水黃泥曲岸相黃綠江南舊遊入夢寐
彷彿五湖春水船錢郎自號五湖長此圖日在衡門邊
胡為款段來長安披裘帶索履後穿我欲與君同扣舷
青蓑蒨笠隨長年詩成閣筆一笑粲簷前急雨衝洄漩

愁霖行

渚灘之歲陰氣凝愁霖不絕如貫絙江星動搖陽景匿
蝦虹閉藏潦霧增玄駒戴粒蟻封穴白躡涉波永出繒
恢台變節百草死縱有紈扇須何曾立秋八日又七夕

不見河鼓低玉繩肅時雨若拈燠若此事無乃非休徵
今年災異亦太劇延慶旱魃嗟頻仍太白失舍晝不入
白青夜見生芒稜左輔銅龍翻地軸川竭水涌竊高陵
我讀劉向五行說天意人事如相乘漢梁之會書地震
龍鬬於鄭梁山崩吁嗟盛世詎有此胡為變易違其恒
何時扶桑日東升重靈一掃天宇澄野人爛睡曲兩肱
晨炊不復愁薪爇

送吳天章歸中條山

月始存房羣陰終凍禽塌翅啼酸風呂生置酒邀我飲
清歌笑倚商玲瓏朝來宿醒卧未析吳郎告我歸河東
北風雨雪滿天地層冰千里高穹窿行人皸瘃手指墮
狐裘嗟汝胡蒙茸長安甲第高入天馬蹄動地聲隆隆
漿酒藿肉不足道金玉磊砢堆堂中汝詩千首文百軸
滲塗未拔誰相通汝家王官谷中條青濛濛藤蘿相糾
水相激至今猿鳥悲司空汝歸讀書甘菽莢致君堯舜
會有日飛伏詎辨誰雌雄

雙劍行孫退谷侍郎席上作

其一魚腸其一有銘
云吳季子之子永寶

用劍凡
九字

延陵季子不忘故千金之寶帶邱墓我聞此語餘千年
何來虎氣騰重泉天精下觀固兩伏雷公擊橐蛟龍纏
古綠光射人瓜皮出土爭新鮮錯落黃金書列星明滅
蒼浪天五步殺一人易如削豚肩又有古魚腸形製殊
蜿蜒貫甲洞胷不濡纓立戟交軋如浮烟幽州十月風
折綿雪片墮地飛烏鳶是時看劍夜置酒快若渴驥奔

長川勾吳舊事足感激悲來清淚忽潺湲延陵已蹈子
臧節誰令窟室生戈鋌太湖魚災事亦逆蘇臺鹿走今
誰憐鱗諸要離匹夫耳屬鏤之賜吾悲焉孫公八十如
電博古直擅歐劉前為公作歌驚四筵烏尾畢逋河漢
懸燈明酒盡雪亦止回看劒氣相騰旋

雪中寄宗定九東原兼呈西樵先生

一冬不雪春融融江梅岸柳俱空濛黃紬衾暖睡初足
起看牕紙何瞳矐蠻奴失喜縛雙帚走報玉戲勞天公

開門三寸沒階砌拂空六出繁簾櫳舟膠浦凍人跡絕
天色慘慘雲而風銅鉗筑響蟹眼沸地鑪火藝獸炭紅
故人昔寄東原圖漁灣窈窕橋梁通馱雪固佳霽亦好
草堂正與圖中同蕭晨畫雪復好手能以粉墨摹虛空
前年幽州大風雪馬毛如蜎鳴雕弓白檀山高鷹隼疾
狐兔殺伐無留蹤故人再寄蕭郎畫寒江釣雪推烟蓬
展看忽憶東原客醉吟禁體追頽翁適客江淮意不樂
悵望百里無由逢何當簞簞挂驢背踏雪直過東原東

題施愚山賣船詩後

國家急廉吏將以風百寮如何十年來吏道紛吳敖
哉此下民鞭朴分安逃魯山與陽城斯人竟難招江西
飽亂離白骨填蓬蒿石田廢不治遺黎雜山魃一二老
寡妻煢煢困征徭昔者數守令為政嚴風飈峻令盛誅
求細不遺齟齬金玉競輦致樂哉共宣驕憲府前上壽
鞠脰一何勞公堂侮下民意氣一何豪寡妻哭向天血
淚埋荒郊亂後幾子遺乃以資汝曹是時宛陵公持節

吉臨交為政貴簡易潔已先清脩放衙苔蘚淨飛鳥營
其巢賦詩彈子嶺慷慨同石壕白鹿與青牛斯道誰鼓
橐公獨奮百世臯比陳唐堯廉耻存網維義利窮毫毛
蘭芷變荊棘孔鸞草鷗臯汝曹即不仁寧終肆闕號七
載一舸歸無物充官艘兩郡萬黔首留公但號眺讀公
賣船詩中心何怱怱填膺抒此詞庶以備風謠他年韋
丹碑會見留江臯翹首望宇中烟火尚蕭條安得百施
公為時激頑澆

吳歷修竹吾廬圖為汪季角題

讀書茅簷下樂於奉朝請
礪邊清淺流屋後檀藥影
借問輞川人何如斤竹嶺

送愚山遊嵩山

夙昔山水懷夢想嵩陽寺
先生江海人蕭條自孤寄
寒潭漸收滌華林起涼吹
落日下輾轅青山帶行騎
褰衣涉清潁羣峰亂蒼翠
二室秋崢嶸三花未顛顚
卻尋盧鴻宅巖扉饒古意
窈窕玉女牕投壺或一至
煙中眺龍

門伊洛宛相次古人去已遠山川見標致安得方外遊
從君共題字

初春四日休沐同荔裳方山西樵往西山道中作
遙山鴈齒列遠水魚鱗波朝朝國西門馬上呈嵯峨卻
掃閉簾閣幽夢紛陂陀坐羨雲間禽歸飛向巖阿上春
寡人事勝侶時來過望山馬注坂投林鳥驚羅行行近
磊砢清暉一何多豈識絕塞山娟靜如媼娥禽夏如可
期遑復知其他

香山寺月夜

明月出東嶺諸峰方悄然殘雪尚在地掩映西齋前竹
色既閒靜松陰媚淪漣清暉一相照萬象皆澄鮮此時
憇寂者宵分猶未眠

觀祕魔崖至龍潭作

山行逐藜若徑轉無人迹亭午踰高嶺逍遙隨所適古
寺披荒榛乍到如有獲盧師晏坐處猶存澗邊石石上
留孤松終古不盈尺地僻山鬼鄰鳥下蒼苔積孤閣臨

寒溪林壑莽蕭槭灌木紛相糾陰厓互崩坼何當秋雨
時驚湍若潮汐來此十日眠濯足蛟龍宅

晚望翠微寺

澗西翠微寺迢迢翠微裏蒼茫采樵路似有微鐘起山
風冷炊烟斜日亂溪水紛紛飛鳥還行人去何已

登石景山浮圖絕頂眺望

浮圖茲山頂峻嶒插孤標千盤歷詰曲直上凌風颭寒
空稍明淨百里見纖毫茫茫塞上山浩洶連波濤渾河

金史卷之二
卷二
盪山來石壁如動搖咫尺居庸關鳥道迴青霄上谷接
雲中設險非一朝

聖代亭障空九泥罷函穀關門開落日士馬無矜驕迴
身望漁洋城闕何杳杳薊邱植汶篁遺烈思燕昭望諸
與騎劫智勇皆蓬蒿朔吹揚驚沙屯雲盤怒鵬慷慨一
傷懷覽古心鬱陶逝將御冷風揮手辭塵囂

碧雲寺魏闡葬衣冠墓

恭顯坐中書能死前將軍赤伏盡鈞黨禍始誅李雲讀

史長太息閔彼漢運屯我來西山遊極目多邱墳何人
穿復土雙闕高嶙峋天祿與辟邪夾道紛錯陳大書復
深刻似欲驕千春冢中玉蟾蜍變化亦有神豈知窮奇
骨不得安窀穸牢石與五鹿彈指隨飈塵嗟哉陽司隸
毅魄為青燐狐貉同一邱無事勞沾巾松風催落日泥
飲當千巡西望咸陽原石馬嘶荆榛

卧佛寺

清晨越南磻畢景來東林石徑入幽閒稍聞鐘磬音禪

房鴨腳古別院杪欒陰春夕月復佳微雲滅遙岑山氣
自翳鬱天宇亦森沉道人澹相對松風灑衣襟風懷清
淨退因識妙明心寂寥無可說請君張玉琴

晚入退谷卻寄孫北海先生

谷口遠烟暝水石起寒色西溪有歸人東峰隱餘日積
雪封巉巖微徑雪中出殘冰流復斷暗泉聽還失不知
荒寒中前峰去安極稍見磴觺牛悵望歸飛翼侍郎昔
掛冠於此散愁疾畫壁滄洲圖

有故友陳路若畫壁結屋雲林側

溪南萬竿竹歲久漸蒙密為述淨名意更就支公室慙
歎解巾非何年此棲息

故明景帝陵懷古

金山南臨裂帛湖荒陵十里鵲鷗呼奪門事往二百載
行人過此猶歎歎紅牆剝盡古瓦落莓苔溜雨生銅鋪
老松離立色枯槁但穴蟲蟻餘根株叢塗龍輜禮本殺
矧乃劫火經樵蘇咫尺天壽雲氣接坏土獨葬西山隅
洪宣老臣稍凋喪國成一旦歸刑餘勃鞞之問史所貶

詎有宦寺干征誅黃沙慘澹鼓聲死萬乘一擲成累俘
國有君矣社稷重孫申謀鄭無差殊白登城南翠華返
錢塘司馬功難誣紛紛南渡議和戰乃知計左非良圖
全寅之占信奇中朝衣東市嗟何辜劒南歸來西內閉
唐家父子輸廐奴處人骨肉事非易子臧季札今則無
功罪千秋有特筆九鼎一髮須人扶謚同泉鳩理太酷
紀年猶幸無草除裁令流水良亦足寧論玉匣還珠襦
欲落不落夕陽下弔古且復留斯須殘碑滅沒牛礪角

石攬橫卧蒼髯鬚君臣一代盡宿草雍門太息當何如

玉泉

蕭晨金山下濯纓玉泉水十畝清瑤流分明鏡相似金
膏時掩映碧玉相傾委水荇隨風翻靡靡映清泚垂楊
夾碕岸其下多芳芷流為裂帛湖宛若昆明裏湖上多
漁村網罟集沙尾宣宗昔遊幸龍舸茲山趾當年功德
寺荒涼嘯山鬼何況芙蓉殿遺跡皆銷毀碧水自東流
彌傷人代駛儻逐五湖舟去問鷓鴣夷子

過金魚池懷愚山因以寄答

昔君振遙策獨往嵩山中還歸陵陽下高詠北樓風
舊榭宛苔迹清池銷蕙叢聊憑一書札緘意向飛鴻

計甫草至得苔文展成既庭書

芳序竟荏苒別離年歲多綠陰散林樾首夏氣清和
懷人罷琴酌思往屬流波還欣松陵子步屨一來過

雨中懷彭義門因示禁詡菴

夏雨忽芊眠流雲度高閣簾幙數禽鳴綠陰一花落
相

思武原子遠寄羊城作文酒昔歡娛別離今寂寞年時
易晚晚壯歲風驚穉何當一樽酒共對成斟酌

井陘關歌

迴星城邊落日黃西來氣欲無太行柏巖雙壁稍狡獪
目成已覺心清涼天公一夜送寒雨千疊萬疊雲錦張
丹崖翠壁窈萬狀瑰奇娟妙難具詳綠蘿蕭蕭冒巾角
石瀨颯颯漸去聲衣裳峯迴徑絕不知數豁豁倏見開中
央戍樓旌竿滿雲直橫亘長城環巨防冠山子城瞰窮

漠噴壑巨瀑聞雷硠登樓顧盼豁胸臆四山雲氣爭飛揚蛟龍鬱律起眼底散為雲雨周八荒關南石勢更奇恠亦如突與連堂皇懸車束馬那可度行人緣棧如秋秧幽并澤潞此天險飛鳥欲過愁翱翔

聖代即今罷烽燧空餘畫角吹嚴霜乃知地利未足恃此關幾閱諸侯王

壽陽驛題韓文公詩後

天寶昔喪亂罕干及阿華扇禍始漁陽流毒被河朔辛

苦九門戰堂堂李與郭滋蔓逮三鎮世守恣兇虐軍中
立留後諸藩擅官爵山東勁兵處縣官實自弱元和聖
天子咨相授方略淮蔡洎淄青次第就束縛移兵壓山
東勢如掃秋穰遺恨功未成殺機生魏博庭湊何么麼
跳梁敢弗恪偉哉昌黎公談笑狎巨鯨我行過壽陽遺
詩緬如昨韓愈殊可惜朝廷乃大錯真卿與巢父茲事
詎堪數誰與秉國成蛾眉竟謠詠杜牧有罪言千秋實
良藥

介山

驅車綿上聚懷古綿上田授壁事已遠遺跡今虛傳晉
國昔多難公子實大賢五蛇為之輔一蛇獨耆乾身隱
竟焉文狐趙羞叱肩逃榮義固高報德理亦然徘徊望
忌坂落日無寒烟何人貪天功嗟哉南內年

首陽山

我我首陽山迢迢屬雷首遙揖巨靈掌近對風陵口蒼
茫河上舟搖落關門柳一詠採薇歌昔人復何有

河上寄山史

前年君往蘭谿道金華洞中拾瑤草傳來八詠似休文
愛翫新詩愁絕倒華陰古道接弘農一望秦山深萬重
遙看青壁孤雲起知在西南第幾峯

拜楊伯起墓道

悠悠關內路驅馬桃林塞歸鳥岳祠邊長河遠天外大
鳥下潼亭落羽今猶在夕日薦蘋蘩愁心逐征旆

渭橋懷古

秦川夕澄霽澧水明如練西上中渭橋颯然秋氣變羸
政昔構造作此象天漢美人與鐘鼓流連恣荒晏徐市
期不來山鬼壁已獻我昨驪山行徘徊弔中叢荆榛蔽
銀海想牧羅金雁麒麟折其股冷落青梧觀後代復何
王繡嶺明珠殿唯有終南山興亡幾回見

望華山

關中八水滙清渭獨朝宗黃河西北來交會船司空河
流挾砥柱岳勢分弘農山河兩戒首氣壓轂函東金天

正肅殺屹然白帝宮削成五千仞真宰散鴻濛及闢見
爰業元精羅心胷倏忽雲氣生西接終南峯諸峯忽已
失俯首趨河潼峨峨司冠冠獨立青雲中蒼茫望三輔
秋氣去安窮荒唐秦王獵寂寞希夷蹤何當駕白鹿還
共驂茅龍

鳳嶺

南岐地何高鳳嶺據其右路絕無鈎梯直上若懸溜日
月互蔽虧光明錯昏晝雲霧四蕩濇雷車中雜糅飛龍

何衙衙夫矯出巖竇俯瞰雨當水奔流下騰湊轉石類
搏櫟畫沙成篆籀初疑饑蛟蟠更作外蛇鬪聞昔周文
王盛德及靈囿鳳鳥此來集世遠事悠謬末季重邊防
戎馬幾馳驟秋風吹散關一夕驚老瘦

柴關嶺

早發陳倉道馬蹄亂雲霧行行到柴關雲低雨傾注
徑中槎牙幽篁四森布大石立當關勢如猛虎踞世無
飛將軍磨牙爾何怒蛟龍喜昵近氣奪生憂懼怪鳥時

一啼聞聲不知處黑江遠瀕洞萬瀑齊奔赴頗聞紫柏
山仙靈所遊寓石髓儻一逢白日生毛羽誰使野鶴姿
氍毹陶籠斂真宰不可問更向蒼茫去

馬鞍嶺

南下畫看關遠色疊諸嶺魚緣百里間斷齧蔽光景寒
虛疲登降纖路亦脩整或仄如連軒或植如負屏或如
岐陽鼓或如宛胸鼎如鳥或跂翼如魚或骨鯁殊狀紛
角逐詭類爭一逞峭岸勢欲圻捷足不遑騁二分垂在

外趾壓後人頂飛瀑時界道赴壑力逾猛人與水鬪爭
心目各相警天意限雍梁設險有斯境君子履忠信小
人懷僥倖永念垂堂言乘危更三省

觀音碕

本名閭王碕賈中丞改今名壁上
有宋荔裳賦棧道平歌沈繹堂書

觀音碕險絕連山列天仗奔峭洶波濤火石蹴龍象造
物鬱磊砢及茲乃一放急瀑何砰訇盤石成巨防渟為
千丈湫潭潭不流宕怪物中屈蟠豈無鎖紐壯儻燃牛
渚犀窮此精靈狀頗聞賈中丞於此鏹疊嶂故人推沈

宋詩筆各雄長星宿森光芒虬龍怒倔強解鞍苔石滑
高歌一神王更須巨靈手運斤出天匠鑱我邨閣銘敵
彼小海唱

七盤嶺

七日行褒斜目瞶耳亦聾濁浪奔崖垠征衣碎蒙茸不
知天地濶詎測造化功岌然土囊口雞憤摩蒼穹磴道
上七盤大翮排天風絕頂忽開豁白日當虛空褒水出
谷流漢江繞其東巴山跨秦蜀蜿蜒連上庸川原盡沃

野天府如關中橘柚鬱成林稻苗亦芄芄襄陽大陂來
千里帆檣通當年號天漢運歸隆準公將相得人傑驅
策芟羣雄一戰收三秦遂都咸陽宮智勇久淪沒山川
自龍蹏跋馬向褒國日落烟濛濛

定軍山諸葛公墓下作

高密起南陽文終從

去聲

高祖暴繁本見疑數刎亦非武

堂堂諸葛公魚水託心膂二表匹謨訓一德追伊呂視
操但如鬼畏蜀還如虎嗟彼巾幗徒與公豈儔伍紫色

復蛙聲抵隙各為主火井方三炎赤伏更平典午志士
恥帝秦祭器猶存魯陰平一失險面縛忘奔莒知公抱
遺憾龍卧成千古峨峨定軍山悠悠沔陽潁鬱鬱冬青
林哀哀號杜宇耕餘拾敗鏃月黑聞軍鼓譙侯寧足誅
激昂淚如雨

五丁峽

南窮石牛道崑崙下雲棧三日招我魂足踣目猶眩豈
知東蒼州耳目益奇變始過金牛驛樛嶂已凌亂漾水

從北來劣足泛鳬雁舉頭嶓冢山
我冠倚天半大哉神禹功從此導
江漢漸入五丁峽譎駭聞見斗壁
何獐獐十萬磨大劒攢羅列交戟
茫昧通一綫亂水殷峽中蛟蜃喜
瀾汗仰眺絕圭景俯聆競雷朴九
鼎鑄神姦到此百憂患東方牧犢
兒竟使蠶叢判我行忽萬里風土
異鄉縣身落大荒西終賴皇天眷
咄咄復何言艱虞一身賤

夜至黃壩驛短歌

氏道森沉十日雨石林冥冥斷行旅洪濤殷地四山動
百折盤渦噤難語前有蝮蛇後豺虎紅鶴哀號奮毛羽
吾生胡為狎此曹命輕如毛爭一縷妻孥飄泊寄京國
欲歸不歸在何所鄉關回首四千里縱有苦辛誰告汝

朝天峽

朝登嘉陵舟日出羌水亦履險倦鞍馬即次亦稱適默
黹雙峽來突見巨靈跼嶄巖無寸膚青冥厲雙翮陰崖
積龍蛻跳波畏鯨擲往往壓人頂駭此欲崩石洞穴峽

半開兵氣尚狼籍蛇豕據成都置戍當險阨至今三十
年白骨滿梓益流民近稍歸天意厭兵革會見實盧人
燒畬開确磻慷慨一扣舷浩歌感今昔風便黎州城茫
茫波濤白

龍門閣

衆山如連鰲突兀上龍背鱗鬣中怒張風雨晝晦昧出
爪作之而神奇始何代亂水趨嘉陵波濤勢交滙萬壑
爭一門雷霆走其內直跨背上行四顧氣什倍夕陽下

岷峩天彭光破碎咫尺劍門關益州此絕塞子陽昔躍
馬妖夢成伯儼區區王與孟泥首終一概李特亦雄兒
僭竊竟何在

桔柏江

小舟飛青鵠西掠馬鳴閣閣道臨天關稍幸息腰脚茫
茫雙江來抱此益昌郭荒城豺虎多殘堞出叢薄國憶
苴侯開江疑鼉靈鑿武都地勢高衆水競流落分道下
氐羌兩川乃磅礴鳴水迴驚瀾陰平劃大壑仇鳩勢未

夷犀牛道彌惡千里會葭萌崩騰似相索潏潏竟同流
西逝連井絡九十九峯間迴首一錯愕

天柱山

朝出玄武門雲垂雨忽凍登登天柱山千盤墮瀕洞崢
嶸逾巴閬槎牙過秦鳳陟嶺如累棋下谷如入甕心俯
尻益高足縮目先送敢嗟鳥獸羣稍喜徒旅衆我有大
羽箭麗龜輒命中於菟昂其首飲羽乃不動道旁松合
抱巨可任梁棟惜哉野蔓纏不蒙匠石用絕頂見岷山

青城亦伯仲一氣連諸蕃三州實西控太平幸無事左
髻時入貢念彼松姚成坐甲苦饑凍俯臨陸海雄仰視
天宇空長嘯千仞岡出險忽如夢



精華錄卷二